

Թողարկում N3, 2018

ՀԱՅԱՍՏԱՆ.

ՖԻՆԱՆՍԱԿԱՆ  
ՆԵՐԳՐԱՎՎԱԾՈՒԹՅՈՒՆ

«ՖԻՆԱՆՍԱԿԱՆ  
ՆԵՐԳՐԱՎՎԱԾՈՒԹՅՈՒՆ»  
ԳՈՒԼ

ՍԵՐԳԵՅ ՍՈՒՔԻԱՍՅԱՆ

ԵՐԵՎԱՆ 2018

## ՀԱՅԱՍՏԱՆ.

### ՖԻՆԱՆՍԱԿԱՆ ՆԵՐԳՐԱՎՎԱԾՈՒԹՅՈՒՆ

### «ՖԻՆԱՆՍԱԿԱՆ ՆԵՐԳՐԱՎՎԱԾՈՒԹՅՈՒՆ» ԳՈՒ ԼԱԲՈՐԱՏՈՐԻԱ

#### ՍԵՐԳԵՅ ՍՈՒՔԻԱՍՅԱՆ

«Հայաստան. Ֆինանսական ներգրավվածություն» վերլուծականը էլեկտրոնային պարբերական է, որի նպատակն է վերլուծել և հանրությանն ամփոփ կերպով ներկայացնել Հայաստանի ֆինանսական ներգրավվածության բաղադրիչների փոփոխությունները:

Պարբերականը հրապարակվում է ՀՊՏՀ «Ֆինանսական ներգրավվածություն» գիտաուսումնական խմբի կողմից: Արտահայտված տեսակետները և եզրահանգումները պատկանում են հեղինակներին և կարող են չհամընկնել ՀՊՏՀ պաշտոնական տեսակետի հետ:

*Հրապարակումից օգտվելիս պարզաճ հղումը պարտադիր է:*

## ՖԻՆԱՆՍԱԿԱՆ ՀԻՄՆԱԿԱՆ ՀԱՍԿԱՑՈՒԹՅՈՒՆՆԵՐ: ՓՈԽԱՌՆՉՈՒԹՅՈՒՆՆԵՐ

- Ներկայումս «ֆինանսական ներգրավվածությունը» լայնորեն կիրառվում է «ֆինանսական կայունություն» և «ֆինանսական զարգացում» բառակապակցություններին զուգահեռ:
- Մեթոդական առումով վճռական է ՀՀ ազգային բանկի հիմնական նպատակների ու գործառույթների վերաբերյալ ՀՀ Սահմանադրության փոփոխությունը՝ «Կենտրոնական բանկի հիմնական նպատակներն են գների և ֆինանսական կայունության ապահովումը»<sup>1</sup>:
- Մինևույն ժամանակ, դեռևս «Հայաստանի Հանրապետության կենտրոնական բանկի հիմնական խնդիրը Հայաստանի Հանրապետությունում գների կայունությունն ապահովելն է: Իր հիմնական խնդիրն իրագործելու նպատակով Կենտրոնական բանկի գործառույթն է հանդիսանում գների կայունության ապահովմանն ուղղված միջոցների ձեռնարկումը: Իր հիմնական խնդիրն իրագործելու նպատակով Կենտրոնական բանկը մշակում, հաստատում և իրականացնում է դրամավարկային քաղաքականության ծրագրերը»<sup>2</sup>: Իսկ ՀՀ ԿԲ արդեն խնդիրներից է՝ «Հայաստանի Հանրապետության ֆինանսական համակարգի կայունության և բնականոն գործունեության ապահովումը, այդ թվում՝ Հայաստանի Հանրապետության բանկային համակարգի կայունության, իրացվելիության, վճարունակության և

բնականոն գործունեության համար անհրաժեշտ պայմաններ ապահովելը»<sup>3</sup>:

- Համադրումն անմիջապես ցույց է տալիս, որ Կենտրոնական բանկը «հիմնական խնդրի» փոխարեն այսուհետ ապահովելու է «հիմնական նպատակներ»: Նկատելի փոփոխություն է՝ «խնդիրը» ձևափոխվել է «նպատակի»: Վերացարկման փորձը հեռացնում է ֆինանսական հիմնական հասկացությունների մեթոդաբանական հիմքերի որոշակիացման հարցից: Ուստի կարելի է ելնել այն ընդհանուր նախադրությից, որ «խնդիրը» լուծում են, այն այժմեա-կան ու շարունակական է, իսկ «նպատակը» սահմանելուց հետո որոշակի հորիզոնով փորձում են ձեռք բերել: Բոլոր դեպքերում, ամենաընդհանուր առումով, «խնդիր» և «նպատակի» միջև սկզբունքային հակասությունը բացակայում է:
- ՀՀ ԿԲ «հիմնական նպատակների» առումով կարևոր է այն, որ «Ֆինանսական կայունության ցուցանիշներ: Կազմմանն ուղեցույցը» պատրաստվել է ի պատասխան ֆինանսական համակարգերի ուժեղ և խոցելի կողմերի գնահատման գործիքների պահանջի առաջացման: Ինչպես ազգային եկամտի վիճակագրության դեպքում, ինչի մշակումը սկսվեց 1930-ական թթ.-ին, ֆինանսական կայունության ցուցանիշների պահանջն առաջացավ ճգնաժամերի և ձևավորված այն ընդհանուր կարծիքի հետ կապված, որ քաղաքականություն մշակողներին անհրաժեշտ են տեղեկատվության նոր տեսակներ, որոնց հիման

<sup>1</sup> Տես՝ Հայաստանի Հանրապետության Սահմանադրություն: Փոփոխություններ: Ընդունված է՝ 6.12.2015 թ.: Գլուխ 14: Հոդվ. 200, կ. 2:

<sup>2</sup> Տես՝ «Հայաստանի Հանրապետության կենտրոնական բանկի մասին» ՀՀ օրենքը: Ընդունված է՝ 30.06.1996 թ.: Հոդվ. 4, կ. 1:

<sup>3</sup> Տես՝ նույն տեղում: Հոդվ. 5, կ. 1, ա):

վրա կարելի է ընդունել որոշումներ»<sup>4</sup>: Շեշտվում է մակրոտնտեսական ցուցանիշներին զուգահեռ ֆինանսական համակարգի կայունության գնահատման ցուցանիշների մշակման պահանջի աղբյուրն ու նշանակությունը:

- Իսկ դեռևս 2006 թ. նշվում էր. «Ֆինանսական շուկաների ազատականացման և համակարգային հետևանքների կարևորության (որ կարող են հանգեցնել ֆինանսական հատվածի թերությունները) աճող ճանաչմանը զուգահեռ, քաղաքականություն մշակողները և մյուս շահագրգիռ կողմերը ավելի մեծ ուշադրություն են դարձնում ազգային ֆինանսական համակարգերի կայունությանը: Արդյունքում առանձին հաստատությունների վաղուց ձևավորված վերահսկողական համակարգերը լրացվում են ազգային ֆինանսական համակարգերի կայունության համար ռիսկերի ընթացիկ դիտարկումներով: Այդ գործունեությունը ստացել է մակրոպրոդեցիալ վերլուծություն անվանումը»<sup>5</sup>: ԱՄՀ-ի «Ֆինանսական կայունության ցուցանիշներ: Կազմման ուղեցույցն» է այն տեսամեթոդական աղբյուրը, ինչի արդյունքում ժամանակագրական առումով նախ ՀՀ կենտրոնական բանկի խնդիրը լրացվել է ֆինանսական համակարգի կայունության ապահովման պահանջով, իսկ հետո նաև տեղ է գտել համապատասխան սահմանադրական փոփոխությունը:
- Առանցքային է «ֆինանսական կայունության» սահմանման հարցը: «Ֆինանսական կայունությունն ապահովում է արդյո՞ք հաստատությունների հուսալիու-

թյունը, շուկաների կայունությունը, ցնցումների բացակայությունը, ցածր տատանողականությունը կամ հիմնարար որևէ այլ բան: Կարող է արդյո՞ք ձեռք բերվել կամ պահպանվել մասնավոր գործողությունների և չսահմանափակված շուկայական ուժերի միջոցով: Եթե ոչ, ի տարբերություն մասնավոր կոլեկտիվ գործողությունների ինչպիսի՞ն է պետական հատվածի դերը: Դա մասնավոր հատվածի համար ժամանակի հա՞րց է: Գոյություն ունի արդյո՞ք համաձայնություն առ այն, թե ինչպես հասնել և պահպանել ֆինանսական կայունությունը»<sup>6</sup>: Առաջադրված հարցերի պատասխանների արդյունքում տրվում է հետևյալ սահմանումը. «Ֆինանսական համակարգը կայունության տիրույթում է, երբ այն ընդունակ է նպաստել (քան թե խոչընդոտել) տնտեսության կենսունակությանը, և հարթել ֆինանսական անհավասարակշռությունները, որոնք առաջացել են ներքին պատճառներից կամ նշանակալի անբարենպաստ և անկանխատեսելի իրադարձությունների արդյունք են»<sup>7</sup>:

- Իսկ ՀՀ կենտրոնական բանկի կողմից տրվել է հետևյալ բնորոշումը. «Ֆինանսական կայունությունը կարելի է բնորոշել որպես ֆինանսական, մակրոտնտեսական պայմանների այնպիսի համադրություն, որի դեպքում ֆինանսական համակարգը՝ ֆինանսական հաստատությունները, շուկաները և շուկայի ենթակառուցվածքները միասին ունակ են դիմակայելու հավանական ցնցումներին ու անհավասարակշռություններին՝ այդ կերպ նվազեցնելով ֆինանսական միջ-

<sup>4</sup> Sbu՝ Показатели финансовой устойчивости. Руководство по составлению – Вашингтон, округ Колумбия, США: Международный Валютный Фонд, 2007 год. Издание подготовлено Службой переводов МВФ. Էջ. xi:

<sup>5</sup> Sbu՝ Financial Soundness Indicators: Compilation Guide – Washington, D.C.: International Monetary Fund, 2006, էջ 1-2:

<sup>6</sup> Sbu՝ Defining Financial Stability. Prepared by Garry J. Shinasi. IMF Working Paper. International Capital Markets Department. October 2004, էջ 3:

<sup>7</sup> Sbu՝ Defining Financial Stability. Prepared by Garry J. Shinasi. IMF Working Paper. International Capital Markets Department. October 2004, էջ 8:

նորոգության գործառույթների ընդհատման հավանականությունը»<sup>8</sup>: Ընդհանուր առմամբ, ՀՀ կենտրոնական բանկի բնորոշումը բովանդակային առումով համապատասխանում է «Ֆինանսական կայունության» ավելի վաղ բերված սահմանմանը և պատասխանում է նույն աղբյուրում առաջադրված հարցերին: Առանցքայինն այն է, որ առաջին հարթությունում են ֆինանսական հաստատությունների, մասնավորապես առևտրային բանկերի ցնցումներին ու անհավասարակշռություններին դիմակայելու ունակության պահանջը, ինչով էլ հենց ակնկալվում է նվազեցնել ֆինանսական միջնորդության գործառույթների ընդհատման հավանականությունը:

- Երկրի տարածքում գործող առևտրային բանկերի ֆինանսական միջնորդության բուն գործունեությունն է ֆինանսական կայունության ապահովման թիրախը: Վերջին հաշվով, ֆինանսական միջնորդությունը հիմնականում հենց բանկային գործունեությունն է, իսկ այդպիսին «... է համարվում ավանդներ ընդունելը կամ ավանդներ ընդունելու առաջարկությամբ հանդես գալը և ավանդն ընդունողի կողմից և ռիսկով դրանք տեղաբաշխելը՝ վարկեր, ավանդներ, դեպոզիտներ տրամադրելու և (կամ) ներդրումներ կատարելու միջոցով»<sup>9</sup>:
- Ձևավորվում է որոշակի միջանկյալ հանգրվան որտեղ, առանց արտաքին մակրոտնտեսական ազդակների հաշվառման, որոշակիացում է պահանջում «Ֆինանսական համակարգի կայունության» ձևավորման շղթան: Երբ ավելի վաղ բերված կայունության սահմանման

մեջ օգտագործվում է «Ֆինանսական համակարգը կայունության տիրույթում է» բառակապակցությունը, ապա ակնհայտ է, որ այն կարող է գտնվել նաև դրանից դուրս: Առաջին հերթին այն կարող է լինել «անկայուն»: Չի բացառվում, որ անկայունության աստիճանը կարող է ստանալ այլ բնութագրումներ ևս: Սակայն ելակետայինն այն է, թե ինչն է ի վերջո դիտվում որպես «կայուն» կամ «անկայուն»: Ակնհայտ է, որ խոսք է գնում ֆինանսական միջնորդային գործունեություն իրականացնող միավորի՝ առևտրային բանկի «ֆինանսական վիճակի» մասին:

- Ֆինանսական հաստատությունների «ֆինանսական վիճակն» է, որ ստանում է «կայուն», «անկայուն» կամ այլ գնահատականներ: «Ֆինանսական համակարգի կայունության» շղթան սկսվում է առանձին վերցրած առևտրային բանկի «ֆինանսական վիճակի» գնահատականից: Նույն մոտեցումը կիրառելի է ֆինանսական հատվածի մյուս մասնակիցների նկատմամբ ևս: Ուստի երկրի տարածքում գործող առևտրային բանկերից յուրաքանչյուրի առանձնացված գործունեությունն է ամփոփվում ընդհանրական՝ թվով 17 առևտրային բանկերի ընդհանուր ֆինանսական վիճակի մեջ, ինչն էլ ի վերջո ձևավորում կամ չի ձևավորում բանկային համակարգի ֆինանսական կայունությունը և դրանով էլ ավարտվում է առևտրային բանկերի մասով «ֆինանսական համակարգի կայունության» շղթան:
- Համաշխարհային ֆինանսատնտեսական ճգնաժամից հետո, «ֆինանսական կայունությանը» զուգահեռ շրջանավում են հասկացություններ, որոնք ուղղակիորեն վերաբերում են ֆինանսական հատվածի մասնակիցներին և նրանց կատարած գործառույթներին: Դրանք

<sup>8</sup> Տես՝ «Ֆինանսական կայունության հաշվետվություն»: 2016: ՀՀ կենտրոնական բանկ: 2017: Ներածական հատված: [www.cba.am](http://www.cba.am)

<sup>9</sup> Տես՝ «Բանկերի և բանկային գործունեության մասին» ՀՀ օրենքը: Ընդունված է՝ 30.06.1996 թ.: Հոդվ. 4, կ. 2:

են «ֆինանսական ներգրավվածությունը» (financial inclusion) և «ֆինանսական զարգացումը» (financial development): Առաջանում է «ֆինանսական կայունության» հետ նշվածների փոխառնչությունների պարզաբանման պահանջ:

- Մասնավորապես ներկայացնելով «Ֆինանսական ներգրավվածություն և ներառական աճ. Վերջին ապացույցների ակնարկ»<sup>10</sup> նյութը, հեղինակները կատարում են հետևյալ հարցադրումը. «Ի՞նչ գիտենք ֆինանսական ներգրավվածության և ներառական աճի միջև կապի մասին»<sup>11</sup>: Ապա նշվում է. «Ֆինանսական ներգրավվածությունը նշանակում է, որ մեծահասակները հասանելիություն ունեն և կարող են օգտագործել ֆինանսական ծառայությունների շրջանակ: Հիմնարար մակարդակի վրա ձևական ֆինանսական ներգրավվածությունը սկսվում է բանկում դեպոզիտային կամ տրանսակցիոն հաշվից»<sup>12</sup>: Խոսք է գնում է ֆինանսական հիմնական ծառայությունների՝ վճարումների, խնայողությունների, վարկի և ապահովագրության մասին: Տվյալ պարագայում «ֆինանսական ներգրավվածության» առնչությունը «ֆինանսական կայունության» հետ վերաբերում է ֆինանսական միջնորդության ուղղություններին՝ հաշիվների բացմանը, վճարահաշվարկային ծառայությունների մատուցմանը, խնայողությունների ձևավորմանն

ու վարկավորմանը: Այսինքն, «ֆինանսական ներգրավվածության» աստիճանի փոփոխությունն ուղղակիորեն ձևավորում և այդքանով ազդում է միջնորդային գործունեություն իրականացնողների «ֆինանսական կայունության» ապահովման ընդհանուր շրջանակի վրա:

- Իսկ «ֆինանսական զարգացման» մասով պետք է նշել հետևյալը. «Ֆինանսական զարգացումը ենթադրում է ֆինանսական համակարգի այնպիսի գործառույթների բարելավումներ, ինչպիսին են. (i) խնայողությունների հավաքագրումը, (ii) արտադրական ներդրումների մեջ կապիտալի բաշխումը, (iii) այդ ներդրումների մշտադիտարկումը, (iv) ռիսկի դիվերսիֆիկացիան, և (v) ապրանքների և ծառայությունների փոխանակումը»<sup>13</sup>:
- Ակնհայտ է, որ «ֆինանսական զարգացման» դեպքում ևս առաջին հերթին խոսք է գնում խնայողությունների ներգրավման և դրանց տեղաբաշխման մասին, ինչը կարող է լինել «ֆինանսական ներգրավվածության» աստիճանի փոփոխության միջոցով, ինչը միևնույն ժամանակ, ենթադրում է «ֆինանսական կայունության» ընդունելի միջակայքում իրականացվող միջնորդային գործունեություն (տես՝ թիվ 1 գծանկարը):


<sup>10</sup> Խոսքը Financial Inclusion and Inclusive Growth: A Review of Recent Empirical Evidence. Asli Demirguc-Kunt, Loera Klapper, and Dorothe Singer. World Bank Group. Development Research Group. Finance and Private Sector Development Team. April 2017 նյութի մասին է:

<sup>11</sup> Տես՝ What do we now about the link between financial inclusion and inclusive growth? Asli Demirguc-Kunt, Loera Klapper, and Dorothe Singer.

<http://blogs.worldbank.org/allaboutfinance/what-do-we-know-about-link-between-financial-inclusion-and-inclusive-growth>

<sup>12</sup> Տես՝ նույն տեղում:

<sup>13</sup> Տես՝ Introducing a New Board-based Index of Financial development. Prepared by Tatsiarina Sviridzenka. Strategy, policy, and Review Department. IMF Working Paper. January 2016, էջ 4. <http://www.imf.org/>



**ԳԾԱՆԿԱՐ 1.** «Ֆինանսական ներգրավվածության», «ֆինանսական կայունության» և «ֆինանսական զարգացման» միջև ընդհանուր առնչությունները